



RUDAR

BROJ 101

**BONITET IZVRSNOSTI
RMU "BANOVIĆI" POSTAO
CERTIFICIRANI PRIVREDNI
SUBJEKT U IZVRSNOSTI**



**IZVJEŠTAJ O POSLOVANJU DRUŠTVA
U PRVOM POLUGODIŠTU OSTVARENA
DOBIT U IZNOSU 4.671.281 KM**



**SEPARACIJA
U RAD PUŠTENNO NOVO
DROBILIČNO POSTROJENJE**

PROIZVODNJA UGLJA I OTKRIVKE VRAĆA SE U OKVIRE PLANIRANIH KOLIČINA PREBAČEN PLAN NA REALIZACIJI OTKRIVKE



Posmatrajući rezultate proizvodnje uglja i otkrivke u posljednjih osam mjeseci tekuće godine može se konstatovati pozitivan i produktivan period poslovanja u RMU „Banovići“ d.d. Banovići. Uprkos problematici sa kojom se posljednjih godina bori kompanije i padu produktivnosti jamske eksploatacije uglja, rezultati na proizvodnji u RMU „Banovići“ su se vratili u okvire planiranih količina.

Tako da je za osam mjeseci ostvarena proizvodnja uglja u visini od 94,76% većinom sa površinskih kopova Rudnika, dok je na realizaciji otkrivke zabilježen prebačaj, odnosno realizovano je 107,15% u odnosu na plan. Eksploatacija jamskog uglja u planiranim količinama moguće je tek krajem tekuće i početkom naredne godine, kada se očekuje rješenje trenutne problematike i u puni pogon vraćanje „Podzemne eksploatacija uglja“.

Sticanje uslova za ostvarenje ovakvih rezultata rada bio je prioritet Uprave Duštva, obzirom da su dužnost preuzeli u periodu kada su parametri na realizaciji proizvodnje bili mnogo ispod plana. Koliko je stanje u Rudniku bilo urušeno svjedoče i rezultati za isti period prethodne godine, kada je proizvodnja uglja iznosila 81,62% u odnosu na plan, dok je otkrivka, koja je za rudnike preduvjet za dalje eksploatacije, ostvarena samo 68,92% od planiranih količina.

Posmatrajući uporedbu rezultata izvjestan je napredak kako na proizvodnji uglja, tako i na proizvodnji otkrivke, a sve je izglednije da će tokom naredna četiri mjeseca doći do ostvarenja, odnosno prebačaja plana

za tekuću godinu i da će rudnik „Banovići“ nakon nekoliko godina ostvariti pozitivan finansijski rezultat i vratiti se nekadašnjem kontinuitetu uspješnog poslovanja.

- Prvi zadatak nove Uprave bio je podizanje mehanizacije i vraćanje u pogon damper kamiona u cilju napredovanja u otkrivanju novih količina uglja, obzirom da je velika problematika bila upravo u otkrivicu. Izradili smo i veliki broj projekata u cilju što bržeg saniranja narušenog ležišta. Sa druge strane, aktivno smo radili na popravljanju narušenih međuljudskih odnosa, ali i stimulaciji radnika za njihove poslove i zadatke koji su u konačnici doveli do pozitivnih rezultata u radu. Već nakon četiri mjeseca efekti planskog rada su bili vidljivi i mjerljivi, što je rezultiralo pozitivnim finansijskim rezultatima od mjeseca novembra 2023. godine - rekao je dr. Mirsad Bečić, Izvršni direktor za tehničke poslove.

U daljem razgovoru, Izvršni direktor za tehničke poslove osvrnuo se i na rebalans Trogodišnjeg, odnosno Godišnjeg plana:

- Urađen je rebalans Trogodišnjeg, odnosno Godišnjeg plana poslovanja u kojem su date realne veličine otkrivke i uglja i to 1,4 milion tona uglja i oko 10,5 milion m³ otkrivke. Postavljeni su realni planovi koji su u skladu sa stanjem u ležištu i u skladu sa raspoloživom mehanizacijom. Do sada to nije bio slučaj jer su planirane veličine bile daleko iznad mogućeg ostvarenja i pri samoj izradi takvih planova, bilo je jasno da će realizacija istih biti nemoguća. Mi

smo se odlučili za realne planove koji su u skladu sa našim mogućnostima i evo već sada možemo tvrditi da su ostvareni rezultati bez obzira na smanjenje plana, veći u odnosu na ostvarene rezultate prethodnih godina. Također, možemo kazati da je ostvarena proizvodnja uglja u prvih šest mjeseci 2024. godine skoro ista, dok je otkrivka veća za više od 1,5 mil. m³ u odnosu na 2023. godinu. Ovo je značajno uticalo na povećanje troškova proizvodnje, ako znamo da je cijena m³ otkrivke u prosjeku oko 9 KM, možemo reći da su troškovi otkrivke povećani za 13,5 mil. KM u odnosu na 2023. godinu, a da smo i dalje pozitivno poslovali – kazao je Bečić.

Pored navedenog, adekvatno i na vrijeme je reagovano kroz promjenu namjene kamiona Belaz 5, te su prvi puta na raspolaganju bile dvije pouzdane cisterne za poljevanje trasa u oba kopa tako da su uprkos dugom sušnom periodu, kopovi radili bez zastoja. Pored mehanizacije, u velikoj mjeri su zaštićena i okolna naselja od prašine.

Aktivnosti su maksimalno usmjerene ka stabilizaciji proizvodnog procesa, čemu će doprinijeti i adekvatno održavanje rudarske mehanizacije, kao i otvaranje

novih investicija. Uprava Društva pregovara sa Razvojn timer bankom o namjenskom kreditu kojim bi se isključivo finansirale investicije koje su u toku i koje će biti pokrenute naredne godine.

- Nadam se da ćemo u kratkom periodu postići dogovor sa Razvojn timer bankom i potpisati ugovor, da bi investiranjem zadržali, ali i povećali proizvodnju uglja i otkrivke, u konačnici da bi obezbijedili stabilno poslovanje – istakao je direktor Društva Rasim Dostović.

Najveća investicija – transportni sistem za otkrivku, dovedena je do kraja, a puštanje u rad se očekuje do kraja godine, te će se na ekonomičan, pouzdan i siguran način obezbijediti dodatne količine uglja.

Pored stabilizacije proizvodnje, te ulaganja u novu opremu, važno je istaći da je Uprava radila i podizanju stepena zadovoljstva kupaca. Protekle tri godine zabilježen je veliki broj reklamacija od kupaca zbog loše kvalitete uglja, što je rezultiralo velikim nezadovoljstvom. Zbog toga je bilo neophodno uraditi dodatne napore u pravcu zadovoljavanja kupaca, tako da je broj reklamacija proteklih godinu dana sveden na minimum, ističu iz Uprave RMU Banovići.

ANALIZA OSTVARENIH PROIZVODNIH REZULTATA ZA PERIOD 01.01.-30.06. U 2023. I 2024. GODINI

Proizvodnja po mjesecima	2023. godina								2024. godina							
	OTKRIVKA (m ³ č.m.)			UGALJ (t s.u.)					OTKRIVKA (m ³ č.m.)			UGALJ (t s.u.)				
	PLAN. OTKRIV.	OSTV. OTKRIV.	%	PLAN. UGALJ	OSTV. UGALJ	%	PL. ko	OST. ko	PLAN. OTKRIV.	OSTV. OTKRIV.	%	PLAN. UGALJ	OSTV. UGALJ	%	PL. ko	OST. ko
JANUAR	969350	593880	61,27	137310	100140,01	72,93	10,43	8,53	843320	908305	107,71	112810	91659,24	81,25	10,47	13,56
FEBRUAR	935930	761290	81,34	132580	104239,24	78,62	10,43	9,82	843320	896300	106,28	112810	113940,88	101,00	10,47	9,19
MART	1102780	788715	71,52	132060	129180,48	97,82	10,43	8,06	872400	1012340	116,04	116700	119546,38	102,46	10,47	9,22
APRIL	1102780	721020	65,38	132060	111406,06	84,36	10,43	8,87	872400	1138290	130,48	116700	128051,26	109,73	10,47	10,13
MAJ	1069350	773000	72,29	127660	121814,62	95,42	10,43	8,65	843320	918820	108,95	112810	112140,36	99,41	10,47	9,72
JUNI	1102780	575090	52,15	132060	96804,5	73,30	10,43	7,82	872400	880845	100,97	116700	100680,44	86,27	10,47	9,70
UKUPNO	6282970	4212995	67,05	793730	663584,91	83,60	10,43	8,62	5147160	5754900	111,81	688530	666048,56	96,73	10,47	10,06



ŠESTOMJESEČNI IZVJEŠTAJ O POSLOVANJU PREDUZEĆA

PRVI PUT POZITIVAN FINANSIJSKI REZULTAT U PRVOM POLUGODIŠTU GODINE

Uprava RMU „Banovići“ d.d. Banovići usvojila je Izvještaj o poslovanja Društva za prvih šest mjeseci tekuće godine, u kojem je po prvi put zabilježen pozitivan finansijski rezultat u prvoj polovini godine. Ostvarena je dobit u iznosu od 4.671.281 KM i predstavlja veliki iskorak u poslovanju preduzeća, obzirom da je prethodne godine u istom periodu ostvaren gubitak u iznosu od 11.270.983 KM.

Rudnik je u posmatranom periodu proizveo 666.048,56 tona separisanog uglja, što je 96,73% u odnosu na planom predviđene količine, prosječne toplotne vrijednosti od 14.040,38 kJ/Kg, što je za 3,99% više od ostvarene toplote u prethodnoj godini.

Od ukupno proizvedenih količina uglja najviše je plasirano prema JP „Elektroprivreda BiH“ d.d. Sarajevo, te kupcima iz oblasti ostale industrije u BiH, a preostale količine plasirane za opštu i široku potrošnju, te dio za ino tržište.

Na osnovu plasiranih količina uglja ostvaren je ukupan prihod u iznosu od 93.847.580 KM, dok je ukupan rashod iznosio 89.223.155 KM, iz čega proizilazi da je Društvo u prvih šest mjeseci poslovalo pozitivno u iznosu od 4.624.425 KM, što predstavlja znatno povećanje prihoda i veliki iskorak ka stabilizaciji poslovanja. Dokaz tome su i rezultati poslovanja za isti period prethodne godine, kada je za prvih šest mjeseci ukupan prihod iznosio 76.860.351

KM, dok je ukupan rashod iznosio 87.355.364 KM, odnosno u prvih šest mjeseci 2023. godine, pod vodstvom bivše Uprave, Društvo je poslovalo sa gubitkom u iznosu od 10.495.013 KM.

Pored negativnog poslovanja, trenutna Uprava Društva preuzimajući dužnost u mjesecu junu 2023. godine zatekla je izuzetno tešku finansijsku situaciju kada su na dan 30.06.2023. godine obaveze prema dobavljačima iznosile 39.581.910 KM, dok su ukupne obaveze prema kreditima (dugoročni i kratkoročni) iznosile 52.776.607 KM.

Sagledavajući zatečeno stanje bilo je jasno da se moraju poduzeti sve aktivnosti kako bi se zaustavio finansijski pad i krenulo u stabilizaciju preduzeća.

- Trebalo nam je nekoliko mjeseci da zaustavimo finansijski pad, što smo uspjeli u mjesecu novembru 2023. godine od kada Društvo uglavnom posluje pozitivno. Teret su nam predstavljale naslijeđene obaveze po kreditnim zaduženjima i dobavljačima, koje adekvatnim metodama nastojimo još uvijek riješiti. Pomak je svakako vidljiv ako sagledamo stanje na dan 30.06.2024. godine kada su obaveze prema dobavljačima smanjene na 36.929.107 KM, dok je stanje kredita smanjeno na 45.633.167 KM. Nadamo se da ćemo nastaviti istim tempom i u narednom periodu dodatno popraviti finansijsku sliku Društva, što bi značilo i konačnu stabilizaciju



poslovanja – kazao je Izvršni direktor za ekonomske poslove Adem Bošnjčić.

Ovakav podatak samo je jedan od dokaza da se provodila uspješna politika poslovanja Društva, da su se donosile ispravne i pravovremene odluke, te da je angažman svih radnika neophodan za nastavak pozitivnog poslovanja i očuvanja kolektiva.

Podstrek za nastavak ovakvog poslovanja svakako je i ostvarena prosječna plata koja je iznosila 1.686,47 KM i za 24,83% je veća u odnosu na ostvarenu prosječnu platu u Federaciji BiH.

Rudnik „Banovići“ ima jaku i stručnu kadrovsku strukturu uz pomoć koje je uprkos naslijeđenoj problematici, te dotrajaloj mehanizaciji uspio pronaći optimalan model za ostvarivanje pozitivnog poslovanja i osiguravanje stabilnosti proizvodnog procesa. Tempo rasta parametara zasigurno će biti nastavljen i u drugom dijelu godine, kada se očekuje i veća proizvodnja uglja, ali i povećana tržišna potražnja.



POTPISAN SPORAZUM O PLAĆANJU DUŽNIH JAVNIH PRIHODA U RATAMA

RMU „Banovići“ d.d. Banovići početkom mjeseca jula potpisao je Sporazum o plaćanju dužnih javnih prihoda u ratama sa Federalnom Poreskom upravom, kojim se daje mogućnost Rudniku da u 60 rata isplati dugovanja za doprinose nastala u prethodne tri godine pod rukovodstvom bivše Uprave Društva.

Naime, zbog loše finansijske situacije u pomenutom periodu stvorila su se dugovanja koja su za radnike predstavljala otežavajuće uslove prije svega prilikom penzionisanja.

Sagledavajući cjelokupnu situaciju protekle tri godine, a zbog lošeg vođenja komandije zatečeni su veliki dugovi prema dobavljačima, kao i neizmirene obaveze prema PIO-MIO. Bilo je neophodno napraviti model isplate dugovanja, koji će Rudnik moći ispoštovati u narednom periodu. Uprava Društva na čelu sa Rasimom Dostovićem aktivno je radila na rješavanju zatečenog problema, a rezultiralo je upravo potpisivanjem pomenutog Sporazuma.

Bitno je napomenuti da je potpisivanju Sporazuma prethodilo to što je Rudnik dostavio dokaze i ugovore

zaključene sa nosiocima osiguranja, plan otplate za tekuću godinu, kao i odgovore zavoda i službi da se redovno plaćaju obaveze po zaključenim sporazumima.

RMU „Banovići“ d.d. Banovići redovno izmiruje tekuće obaveze plaćanja poreza i uredno podnosi porezne prijave potvrđeno je aktom iz Porezne ispostave Banovići, što je dodatno predstavljalo olakšanje pri iznalaženju adekvatnog rješenja i otplate duga.

- Uspjeli smo pronaći najbolje rješenje za dugovanja koja smo naslijedili za PIO-MIO i time našim radnicima osigurali nesmetano penzionisanje. U narednom periodu nastojat ćemo obezbijediti kreditna sredstva i za preostala dugovanja prema dobavljačima koja je ostavila prethodna Uprava. Intenzivirali smo aktivnosti na rješavanju takvih problema, kao i na otvaranju novih investicija. Rudnik sigurno ide putem ka stabilizaciji poslovanja i vraćanju nekadašnjeg ugleda – kazao je direktor Društva Rasim Dostović.

SEPARACIJA

PUŠTENNO U RAD NOVO DROBILIČNO POSTROJENJE U VRIJEDNOSTI OD 1,3 MILIONA KM



Sredinom mjeseca septembra na pogonu „Separacija“ montirano je i pušteno u rad drobilično postrojenje renomiranog svjetskog proizvođača FLSmidth. Vrijednost investicije je oko 1,3 miliona KM i radi se o drobiličnom postrojenju kapaciteta 700-900 t/h. Radnici pogona od mjeseca juna, uz stručni nadzor isporučioaca, intenzivno su radili na pripremi i montaži drobilice, da bi je uz prisutvo predstavnika proizvođača pustili u radi i time za 60% smanjili zastoje u tehnološkom procesu.



- Nakon puštanja drobiličnog postrojenja u rad svakako će doći i do poboljšanja rada cjelokupnog tehnološkog procesa, odnosno sačuvat će se strojevi, trakasti transporter, mašine taložnice i u kompletu bit će olakšan rad cijelog pogona separisanja. Olakšan i pouzdaniji tehnološki proces osigurat će sigurno i kvalitetnije oplemenjen ugallj – rakao je tehnički rukovodilac pogona „Separacija“ Mensur Gutić.

Kako navode iz pogona, konstantno se radi na obnovi tehnološkog procesa. Pokrenut je postupak nabavke sita za rasterećenje i u narednom periodu očekuje se realizacija, kao i nabavka mašine za čišćenje, dok se za sito za suho odsijavanje traži najbolje rješenje da bi se pristupilo postupku nabavke.

Ono što pogonu trenutno nedostaje jeste radna snaga, posebno mašinske struke. Raspisanim Javnim pozivom za prijem radnika predviđen je određen broj radnika koji će samo dijelom nadomjestiti nedostatak, dok su potrebe pogona za radnom snagom dosta veće.

OSIGURAN PLASMAN SVIH PROIZVEDENIH KOLIČINA UGLJA

Proizvodnja uglja odvija se u okviru zacrtanih planova, a najviše količina uglja plasira se u JP „Elektroprivreda BiH“ d.d. Sarajevo, „Alumina“ d.o.o Zvornik, „Natron-Hayat“ d.o.o Maglaj, „Sisecam Soda“ d.o.o. Lukavac.

- Plasman uglja značajno je podložen uticaju mnogih faktora na koje Rudnik ne može uticati. Međutim, u trenutnim okolnostima, sa nestabilnim tržištem, velikom konkurencijom drugih ugljeva i energenata, uspjeli smo osigurati plasman svih količina koje su planom proizvodnje predviđene za tekuću godinu, uz mogućnost i većih količina cca. 10%. Naime, od planiranih 1.400.000 tona separisanog uglja ugovorili smo za 2024. godinu 800.000 tona za JP „Elektroprivreda BiH“, 200.000 tona za „Alumina“ Zvornik, 160.000 tona „Sisecam Soda“ Lukavac, 120.000 tona „Natron-Hayat“ Maglaj, 50.000 tona za šećerane Sunoko, te 70.000 tona za ostale kupce – kazao je direktor Društva Rasim Dostović.



Međutim, nadolazeći hladniji period i početak grejne sezone uveliko je proširio potražnju za određenim asortimanima uglja za široku potrošnju, što će kompaniji osigurati i veće prihode.

Trenutna pouzdanost pogona može odgovoriti ugovorenom plasmanu uglja, ali i očekivanom povećanju tržišne potražnje u narednom periodu.

- Ono što trenutno ulijeva optimizam je i očekivani plasman za 2025. godinu, gdje smo od ranije spomenutih kupaca već dobili informacije, a od nekih i zvanične pismene zahtjeve za narednu godinu, gdje traže iste ili čak i veće količine uglja. JP „Elektroprivreda BiH“ traži povećanje za 100.000 tona, „Sisecam Soda“ Lukavac za 20.000 tona, zatim „Natron-Hayat“ Maglaj za 20.000 tona čime je osiguran plasman uglja planirane proizvodnje - dodao je Dostović.

Od druge polovine 2023. godine ugovoren je i plasman niskokaloričnog uglja sa veoma značajnim kupcem „Natron-hayat“ Maglaj. Vraćeno je i povjerenje ostalih kupaca, kao što su šećerane „Sunoko“ Novi Sad, gdje je sa isporuke od 6.000 tona u 2023. godini ugovoreni plasman povećan na 50.000 tona.

Prodaja spomenutih količina uglja ugovorena je po većim cijenama i drugim pogodnostima kojih u ranijem periodu nije bilo. Tako da sa manjim

količinama uglja, uz učešće niskokaloričnih ugljeva, ostvaruju se veći prihodi od rashoda, odnosno Rudnik ostvaruje pozitivne rezultate.



**„POVRŠINSKA EKSPLOATACIJA UGLJA“ NESMETANO
ODGOVARA POSTAVLJENIM PLANOVIMA****AKTIVNOSTI USMJERENE NA OTKRIVANJE
NOVIH KOLIČINA UGLJA**

Realizacija godišnjeg plana na otkrивci i uglju u pogonu „Površinska eksploatacija uglja“ je iznad 100 % i potpuno je spreman podmiriti povećane zahtjeve tržišta ukoliko se to pokaže potrebnim. Radovi se odvijaju u skladu sa zacrtanim planovima za tekuću 2024. godinu i u skladu sa odobrenom projektnom dokumentacijom.

- Površinski kopovi su dobro i pravilno razvijeni, pravac radova i prioriteti otkopavanja pojedinih revira su dobro usmjereni, a sve zahvaljujući dobro osmišljenom inženjerskom radu naših kadrova u čijoj je to nadležnosti. Cilj nam je u ovoj i u narednim godinama da se radovi na otkrивci ispunjavaju preko zacrtanih godišnjih planova, kako bi se što prije nadoknadili gubici i zastoji na otkrивci iz predhodnog perioda, radi što sigurnijeg načina otkopavanja uglja i smanjenja uglova nagiba radnih kosina. Samo tako je moguće izbjeći prethodnu praksu podbijanja etaža i potkopavanja radilišta – kazao je tehnički rukovodilac pogona „Površinska eksploatacija uglja“ Bego Birparić.

Za ispunjenje ovog zadatka potrebni su višegodišnji dobri radovi na otkrивci, investiciona ulaganja u rudarsku opremu i maksimalno korištenje inženjerskog kadra. Ovo je dobar početak i evidentno je da se za sada uspijeva odgovoriti zadatku.

Dokaz tome je i dovoljno otkrivenih količina uglja za

realizaciju proizvodnje na uglju za 2024. godinu. Međutim, treba napomenuti da se uskoro otvaraju i nove rezerve otkrivenog uglja u oba površinska kopa, što će biti dovoljno zaliha za prvih šest mjeseci u narednoj godini. Aktivnosti i priprema su usmjerene i na radove na otvaranju novih količina uglja za period za naredne tri godine u zapadnom dijelu PK „Grivice“ i u centralnom dijelu PK „Turija“. U tom cilju je već završena potrebna tehnička dokumentacija i već jedan bager transportovan na radilište. Iz svega navedenog vidljivo je da za sada nema problema sa količinama pripremljenog i otkrivenog uglja.

Osim sprovođenja aktivnosti za pripremu i otkrivanje novih količina uglja, postojećih dnevnih ili mjesečnih aktivnosti intenzivno se radi i na sprečavanju onečišćenja uglja. Cilj je da se adekvatnim načinom otkopavanja uglja postigne što manje primjese jalovine da bi se Separaciji olakšao posao razdvajanja, odnosno nastoji se da što manje količine uglja odu sa otkrивkom na jalovišta.

Da bi se nastavio stabilan proces proizvodnje veliku ulogu igra i ispravnost rudarske mehanizacije, koja je na veoma visokom nivou zahvaljujući dobroj organizaciji, stručnim i kvalitetnim majstorima, kao i dobrom i iskusnom inženjerskom kadru.

- Imamo dobru podršku nabavke rezervnih dijelova i repro-materijala i uvijek brzu intervenciju cjelokupne

Uprave Društva za podršku i rješavanje određenih problema. Naravno ovakvu tendenciju održavanja ispravnosti osnovne i pomoćne mehanizacije treba stalno poboljšavati i usavršavati. Uz realizaciju raspisanog konkursa za prijem novih radnika u svim cjelinama posebno u cjelinama održavanja, očekujemo još bolje održavanje nivoa ispravnosti naše mehanizacije – kazao je Birparić.

Broj radnika na održavanju osnovne i pomoćne rudarske mehanizacije nije dovoljan i to se za sada rješava povećanim angažmanom postojećih radnika, a bit će ublažen prijemom novih radnika već raspisanim konkursom. Pored toga, obzirom na dobru organizaciju i posvećenost uspjeva se zadržati kontinuitet rada potrebne mehanizacije, tako da su površinski kopovi uglavnom snadbjeveni sa raspoloživom mehanizacijom. Redovno se vrše sanacije, popravke i remontu na mašinama i uz pravilno rukovanje sigurno mogu izraditi još mnogo godina.

Da bi ispunili planove na proizvodnji, održavali ispravnost mašina i doprinijeli stabilnosti cjelokupne

kompanije u pogonu „Površinska eksploatacija uglja“ vrijedni radnici koji ostvaruju dobre proizvodne rezultate stimuliraju se za rad u vidu dodatnih primanja. Tako da su razlike u platama značajne i vidljive kod radnika koji su redovno prisutni na poslu i ispunjavaju svoje norme.

U tekućoj 2024. godini nisu izostavljene ni nabavke neophodne opreme, jedan dio operme je nabavljen, a jedan dio je u procesu nabavke, odnosno: 6 dizel motora za damper kamione, kamion tegljač (tzv labudica), cisterna za vodu, dizel hidraulični bager sa dubinskom kašikom 3m³, elektro oprema za odlagališni transporter, tri pik-up vozila i pet niva. Za sljedeću godinu planirana je nabavka dva damper kamiona, još jednog dizel hidrauličnog bagera sa dubinskom kašikom kapaciteta preko 8m³, dva buldozera, dizalica preko 90 tona itd. Dakle vidljivo je da je akcenat stavljen na nabavljanje proizvodne rudarske opreme kao i na uspostavu TS-a za otkrivku. Sve navedene investicije će biti dovoljne za realizaciju zacrtanih rudarskih planova i za stabilniju i sugurniju proizvodnju uglja i radova na otkrivci.

TRANSPORTNI SISTEM ZA ODLAGANJE JALOVINE

Glavni oslonac razvoja i stabilnosti Rudnika treba da bude pokretanje Transportnog sistema za otkrivku sa površinskog kopa „Turija“ na površinski kop „Čubrić“. To je najveća poslijeratna investicija koja se nepotrebno osporavala i zbog koje su uzalud izgubljene prethodne godine. Bez ovog sistema rada na otkrivci nije moguć opstanak Rudnika, obzirom da predstavlja najbolji metod za podizanje nivoa proizvodnje i stvaranje određenih ušteda. Zbog toga su se maksimalno intenzivirale sve potrebne radnje da se ovaj sistem zajedno sa odlagačem i drobilicama uspostavi i pokrene. Do sada je u vrlo kratkom periodu urađeno niz aktivnosti; nasipanje i nivelacija terena, montaža odlagališnog transportera, pregled i popravka utvrđenih nedostataka na drobilničnim postrojenjima, priprema za izradu zaštitnog nasipa između trakastog transportera i naselja Stražbenica.

Puštanje u rad kompletnog transportnog sistema za otkrivku očekuje se krajem 2024. godine. Kada se to desi može se reći da je Rudnik stekao mogućnost da postane ponovo stabilan, istakli su iz rukovodstva pogona „Površinska eksploatacija uglja“.



PODZEMNA EKSPLOATACIJA UGLJA

JAMSKA EKSPLOATACIJA UGLJA TRPI POGREŠKE IZ RANIJEG PERIODA PROIZVODNJA UGLJA ISPOD PLANIRANIH KOLIČINA

Rudnik „Podzemna eksploatacija uglja“ suočen je sa veoma složenom problematikom nastalom u ranijem periodu donošenjem pogrešnih i neadekvatnih odluka, koja se u velikoj mjeri odražava na sam proces eksploatacije uglja, što je dovelo da su u posljednjem periodu proizvedene količine uglja znatno ispod planiranih količina.

Prognoze su da će se smanjenje proizvodnje uglja zadržati i u narednih nekoliko mjeseci isključivo zbog osiguranja sigurnosti radnika, koja je prioritet i istoj se pridaje posebna pažnja, a uz veliki napor uposlenika i Uprave Društva održava se na dostignutom nivou, pa i na uštrb smanjenja proizvodnje.

Što se tiče radova u pogonu „Podzemna eksploatacija uglja“ trenutno se vrši otkopavanje mehanizovanim širokim čelom u Otkopnom polju Z2/2, praćeno frontalnim nailaskom na stare jamske prostorije, izrađene osamdesetih godina prošlog stoljeća. Ove prostorije su popunjene zavodnjanim materijalom sa još uvijek stabilnom podgradom, te je zbog toga stvorena potreba da se prije svakog rezanja uglja manualno vade dijelove ove podgrade koje uzrokuju često pojavu iznenadnih ruševina. Izvođenje radova dodatno otežava i voda koja se nakuplja u prostoriji KMŠČ i utiče na stabilnost mehanizovanog čela i sekcija podgrade.

Sve navedeno je obrađeno odobrenom tehničkom dokumentacijom i značajno je uticalo na smanjenje dinamike otkopavanja uglja u Otkopnom polju Z2/2, što je i bilo je očekivano obzirom na loše upravljanje prethodnih godina.

- Tadašnje rukovodstvo Rudnika „Podzemna eksploatacija uglja“ je donijelo odluku 2022. godine da se ide u

pripremanje novog odkopnog polja Z6/2 ispod prostorija gdje ima aktivan požar. Iako nas je to interesovalo, nismo uspjeli naći nikakve zapisnike na osnovu čega je donešena takva odluka. Takođe kroz dokumentaciju, odnosno po Godišnjem planu za 2022. godinu za pripremu je planirano otkopno polje Z7. Znači, pripremanja Otkopnog polja Z6/2 se vršilo na osnovu odobrene tehničke dokumentacije urađene za vrijeme bivše Uprave Društva. Veliko je pitanje zašto se donijela odluka da se ovo otkopno polje priprema kao naredno za otkopavanje obzirom da je svima bilo poznato da u Ventilacionoj prostoriji Otkopnog polja Z6/1 ima aktivan endogeni požar. Rezultati laboratorijskih analiza i mjerenja ručnim indikatorima sastava jamskog vazduha su to redovno potvrđivali, a koncentracija gasova uvijek se držala ispod dozvoljenih koncentracija primjenom dodatnih mjera zaštite – kazao je tehnički rukovodilac pogona „Podzemna eksploatacija uglja“ Dževad Dostović.

Radovi na pripremanju Otkopnog polja Z6/2 završeni su početkom juna tekuće godine, a prebacivanje opreme planirano je u mjesecu avgustu. Međutim, znajući da je požar u dijelu Ventilacionog prekopa i dalje aktivan, održano je nekoliko sastanaka inženjerskog kadra iz ovog pogona gdje je odlučeno da se uradi dio nove prostorije kako bi se zaobišla požarna zona i na taj način osigurala sigurnost radnika i na adekvatan način zaštitila oprema.

Nakon iznađenog rješenja pristupilo se radovima na zaobilasku požarne zone i trenutno se vrši izrada dijela nove Ventilacione prostorije, što je i uzrok što se oprema iz otkopno polje Z2/2 jaš nije prebacila u otkopno polje Z6/2. U pogonu očekuju da će se radovi okončati u naredna 2-3 mjeseca, a za to vrijeme mehanizovano široko čelo se priprema za likvidaciju, a kada se stvore uslovi izvršit će se



prebacivanje opreme u otkopno polje Z6. Nakon okončanja pomenutih radova očekuje se normalizacija proizvodnje uglja iz jamske eksploatacije.

Također stanje opreme u jami i stanje radne snage svakako bitno utiče na intenzitet izvođenja rudarskih radova i mogućnost održavanje proizvodnje uglja.

Poslije katastrofalnog požara u jami 2021. godine, jama je ostala bez značajne opreme koja je trajno oštećena ili izgubljena u požaru, a u tom periodu nije bilo nabavke opreme, što je uticalo da se povećaju aktivnosti na nabavci potrebne opreme i na obnovu postojeće.

U zadnjih godinu dana na pogon je stiglo 1.000 metara jamske pruge za dizel lokomotivu sa pripadajućim skretnicama, a veći dio je i ugrađen. Nabavljeni su i rezervni dijelovi za Dizel lokomotivu, te je izvršen generalni remont iste. Također, nabavljen je separadni ventilator snage 2x11 kW sa pripadajućom opremom, potpisan je niz Ugovora (milionske vrijednosti) za nabavke rezervnih dijelova za održavanje opreme mehanizovanog širokog čela.

Što se tiče raspoloživosti radne snage, tehnički rukovodilac pogona navodi da je izražen problem zbog toga što je sve manje radnika koji mogu i hoće da rade u jami.

- U periodu od 01.06.2020. godine pa do 01.06.2023. godine, prethodna Uprava, u četiri ciklusa izvršila je prijem novih radnika u jamu u ukupnom broju od 119, od kojih se danas u Rudniku „Podzemna eksploatacija uglja“ vodi njih 43. Znači za tri godine neko je odmah po prijemu njih 76 prebacio na druge pogone. Problem radne snage još više dolazi do izražaja ako se zna da od ukupnog broja zaposlenih u Podzemnoj eksploataciji njih 121 su radnici sa smanjenom radnom sposobnošću, invalidi II kategorije, da je svaki mjesec na bolovanju između 120 i 140 radnika od kojih 56 na bolovanju dužem od 42 dana – kazao je Dževad Dostović.

Navedeni podaci o problemu sa radnom snagom ukazuju koliko je teško, vrlo često nemoguće, u kontinuitetu držati

aktivna bar dva radilišta u jami, KMŠČ i bar jedno pripremno radilište uz potrebu održavanja i drugih aktivnih prostorija u jami.

Nadanja su da će aktualni prijem novih radnika, redovne nabavke opreme i blagovremeno održavanje postojeće opreme poboljšati cjelokupno stanje u pogonu i u narednom periodu proizvodnju uglja dovesti na planirani nivo.

Na štetu je išlo i uvođenje mobilnih drobilica niskog kapaciteta, koje su proizvodile ugulj koji nije odgovarao stvarnim deklaracijama za kvalitet, te je na taj način narušen i kredibilitet kod kupaca.

Pored toga, na rezultat separisanog uglja veliki uticaj imalo je i dugogodišnje nedovoljno ulaganje u tehnološki proces na pogonu, gdje se trenutno radi sa dotrajalom opremom. U prethodnom periodu izvršena je samo nabavka grajfera Liebherr, koji je u velikoj mjeri doprinio radovima na depoima uglja. Završen je i postupak nabavke primarne drobilice, za koju se očekuje isporuka, te je planirano da se ista ugradi u pogon do kraja mjeseca februara naredne godine, što će umnogome olakšati rad tehnološkog procesa u smislu nesmetanog stvaranja rovnog uglja na projektovane granulacije.

Zastarjela oprema uzrokovala je i mnogo zastoja i remonta, koji su obuhvatali učestale zamjene platna na trakama, remonte elevatora sa zamjenom pripadajuće opreme, te mnogih drugih radova s ciljem što boljeg separisanja rovnog uglja.

Problemi se dalje ogledaju i u nedostatku proizvodne radne snage. Ovakav tip problema do sada je prevazilažen dodatnim nadljudskim zalaganjem radnika, koji se dodatno žrtvuju da bi u izuzetno teškim uslovima osigurali nesmetan proces separisanja.

U konačnici, da bi se održao i unaprijedio tehnološki procesna pogonu „Separacija“ ulaganje u opremu je od krucijalnog značaja, kao i rješavanje problema sa nedostatkom proizvodne radne snage.

RMU „BANOVIĆI“ d.d. BANOVIĆI

OTVOREN JAVNI POZIV ZA PRIJEM RADNIKA

Uprava RMU „Banovići“ d.d. Banovići krajem mjeseca avgusta raspisala je Javni poziv za prijem radnika na određeno vrijeme. Iako je sa pogona Rudnika iskazana potreba za znatno većim brojem radnika, zbog Godišnjeg plana poslovanja i Zaključka Nadzornog odbora Društva, Uprava je bila prinuđena na raspisivanje konkursa za prijem 168 novih radnika.

Najveća potreba za novim radnicima iskazana je prema proizvodnim radnicima, rudarske, mašinske i elektro

struke, te radnicima na poslovima održavanja i administracije. Odaziv po Javnom pozivu svakako je zadovoljavajući, obzirom da svakodnevno pristiže desetine novih prijavi.

Iz rukovodstva Rudnika navode da će u narednom periodu doći i do izmjene Trogodišnjeg plana poslovanja, kojim će se osigurati dodatno povećanje broja zaposlenih, a ujedno i zadovoljavanje potrebe za radnicima iskazanih sa pogona rudnika „Banovići“.

ŽELJEZNIČKI TRANSPORT

IMPROVIZACIJOM DO OBNOVLJENE
PARNE LOKOMOTIVE 83-158

Proteklih nekoliko mjeseci na pogonu „Željeznički transport“ rađeno je na obnovi parne lokomotive 83-158 proizvedene 1948. godine za čiju sanaciju više nije moguće pronaći odgovarajuće rezervne dijelove, te se moralo pristupiti improvizaciji i reparaciji starih dijelova.

- Naši radnici vođeni mladim inženjerima u izuzetno zahtjevnim uslovima uspjeli su obnoviti parnu lokomotivu koja predstavlja simbol RMU „Banovići“ d.d. Banovići i na taj način produžiti vijek trajanja lokomotive, te osigurati nesmetan prijevoz uglja sa eksploatacionih pogona do Separacije. Na našu žalost, zbog starosti lokomotiva kojima raspolaže Rudnik i perioda proizvodnje istih, danas je skoro pa nemoguće pronaći rezervne dijelove za obnovu. Međutim, zahvaljujući stručnosti radnika, te njihovom kreativnom radu uspjeli smo generalno remontovati lokomotivu, koja u narednom periodu može nesmetano obavljati vuču vagona – kazao je Davorin Zarić, tehnički rukovodilac pogona „Željeznički transport“.

Početak godine iz generalnog remonta izašla je i lokomotiva 740-107, gdje je urađen kompletan donji

stroj, ubačen novi remontovani motor, kompersor i mjenjač.

Iako pogon raspolaže sa vrhunskim inženjerima i majstorima u narednom periodu prijeko je potrebno povećati broj zaposlenih, prvenstveno su neophodni majstori za poslove manevrisanja, te fizički radnici na održavanju pruge.

- Svake godine u penziju ispratimo nekoliko radnika što dovodi do potrebe za novim kadrom. Također smo došli u situaciju da za pojedine zanate nema ko da obuču mlade ljude, ili čak da ne postoji zainteresovanost ljudi, što dodatno predstavlja problem u kompaniji u kojoj je takva struktura radne snage neophodna. Na nivou Rudnika raspisan je konkurs o prijemu novih radnika, tako da se očekuje prijem i u našu organizacionu jedinicu kako bi se olakšali poslovi i povećala produktivnost rada – dodao je Zarić.

Rješavanjem problema kadrovske strukture u ovom pogonu aktivnosti će biti usmjerene na nabavku reparirane lokomotive, da bi se osigurao nesmetan prijevoz uglja.



INVESTICIJE I RAZVOJ NOVIH DJELATNOSTI

TENDENCIJA RJEŠAVANJA EKSPROPRIJACIJE UGOVOROM POKAZALA NAPREDAK U OVOJ OBLASTI

U Službi za eksproprijacije i rudarske štete u toku tekuće godine došlo je do povećanja obima poslova, što je dovelo do rješavanja ili okončanja velikog dijela zaostalih predmeta iz prethodnog perioda, te predmeta koji su prema redovnom Godišnjem planu poslovanja, pokrenuti ili završeni u okviru realnih vremenskih mogućnosti.

Uvedena je praksa dogovaranja sa strankama u skladu sa Zakonskom legistativom koja tretira ovu oblast, te se težilo da što manje predmeta ima sudski epilog, jer je utvrđeno da putem sudskog procesa, koji obično traje i do nekoliko godina, preduzeće ima samo uvećanje troškova zbog vođenja dugotrajnih procesa i nakon toga plaćanja sudskih troškova i troškova kamata.

- Dogovorom je izvršena eksproprijacija nekoliko objekata i parcela u selu Bučik, trenutno se priprema dogovor sa mještanima dijela sela Mrdići, a ovaj proces je usporen zbog zastoja u radu općinskog vijeća. U selima Tulovići i Treštenica pripremaju se eksproprijacije preostalih objekata i parcela vezanih za PK Turija – naveo je Izvršni direktor za investicije i razvoj novih djelatnosti dr. Nenad Todorović.

Formirane su komisije za praćenje stanja objekata koji mogu potencijalno biti ugroženi od rudarskih radova sa zadatkom da utvrde tzv. „nulto“ stanje objekata, odnosno zatečeno stanje na objektima prije nego bi moglo doći do ugrožavanja od rudarskih radova, kako bi se mogla imati procjena za eventualne štete koje bi nastale od rudarskih radova. Također, formirana je i komisija za procjenu rudarskih šteta na parcelama koje su u zoni rudarskih radova, ili na neki način postoji mogućnost oštećenja ili umanjenog prinosa na parcelama, koja prati stanje na terenu i u skladu sa eventualnim štetama donose se odluke o nadoknadi

štete stanovništvu putem dogovora, te se izbjegavaju sudski procesi i na ovom polju.

Pored poslova ne eksproprijaciji, tokom 2024. godine radilo se i na realizaciji nabavke 3 terenska vozila u vrijednosti od 218.942,10 KM, nabavke dizel motora Cummins vrijednosti 4.680.000 KM, 3 terenska vozila sa otvorenim sandukom vrijednosti 228.114,90 KM, šinskih segmenata pruge sa prelazima, skretnicama i krivinama za dizel lokomotivu vrijednosti 1.743.300 KM, cisterne za vodu zapremine minimalno 8000 litara u vrijednosti od 350.941,50 KM, te nabavke hidrauličnog bagera sa dubinskom kašikom zapremine minimalno 3m3.

Bitno je spomenuti da su planom bila predviđena veća sredstva za investiranje, ali zbog poznatog stanja nedostatka sredstava, odnosno zatečenog stanje prije godinu dana i nemogućnosti finansiranja investicionih ulaganja zbog prethodne prezaduženosti preduzeća, sredstva su smanjena i prilagođena isključivo održavanju nesmetanog procesa proizvodnje.

Također, u sklopu pomenutog resora u skladu sa mogućnostima provedene su aktivnosti građevinske operative, gdje se u toku godine radilo na realizaciji i praćenju nekoliko objekata koji su realizovani kroz investicije u prethodnom periodu, kao i na redovnom održavanju i sanaciji objekata Društva.

U sektoru za projektovanje, tehničko tehnološko planiranje i razvoj radovi su se odvijali u skladu sa planskim zadacima, a posebno u Službi za projektovanje, koja pored izrade projektne dokumentacije radi i na poslovima izdavanja upotrebnih dozvola za postrojenja i uređaje u okviru Društva, na koji način se na godišnjem nivou Društvu uštede velike količine novca.

**RMU „BANOVIĆI“ d.d. BANOVIĆI IMENOVANA UPRAVA DRUŠTVA
NA MANDATNI PERIOD OD 4 GODINE**


SPROVEST ĆE SE KONKRETNIJI POTEZI KA POBOLJŠANJU POSLOVANJA KOLEKTIVA



Nakon godinu dana u kojoj je vodstvo Rudnika obavljala v.d. Uprava, krajem juna po okončanju konkursne procedure i uz saglasnost Vlade FBiH imenovana je Uprava na mandatni period od 4 godine.

Povjerenje Vlade FBiH zadržali su svi raniji vršioci dužnosti, odnosno za Direktora Društva imenovan je Rasim Dostović, Izvršnog direktora za tehničke poslove dr. Mirsad Bečić, Izvršnog direktora za investicije i razvoj novih djelatnosti dr. Nenad Todorović, Izvršnog direktora za pravne i kadrovske poslove Enes Šabanović, te za Izvršnog direktora za ekonomske poslove Adem Bošnjčić.

Iako je Uprava Društva i u proteklom periodu napravila ogroman iskorak ka očuvanju Rudnika i vraćanju povjerenja kupaca i dobavljača, za naredni period najavili su dalje i ofanzivnije djelovanje ka ostvarivanju ciljeva poslovanja. Trenutno najveći problem svakako predstavlja cijena uglja prema termoelektranama. Napominjemo da je Uprava Društva u pomenutom sastavu već ranije uspjela izdejstvovati povećanje cijene uglja na 7,8KM po GJ, ali ta je cijena još uvijek daleko ispod stvarne tržišne cijene uglja.



BONITET IZVRSNOSTI

RMU „BANOVIĆI“ d.d. BANOVIĆI POSTAO CERTIFICIRANI PRIVREDNI SUBJEKT U IZVRSNOSTI


Bonitetna ocjena izvrsnosti predstavlja nadprosječnu bonitetnu vrijednost privrednih subjekata, koja je kod RMU „Banovići“ d.d. Banovići primijećena i ocijenjena za 2024. godinu. Rudnik „Banovići“ prepoznali su kao stabilnu i pouzdanu kompaniju, što dokazuje postignućem međunarodnih standarda bonitetne izvrsnosti.

Zahvaljujući ovom certifikatu RMU „Banovići“ stiče priliku za nove poslovne saradnje sa drugim firmama koje posluju kako na domaćem tako i na inostranom tržištu. Na ugled Rudnika znatno je uticala dobra poslovna etika, rezultati poslovanja u tekućoj godini, kao i stečeno povjerenje, što je zajedno doprinijelo prepoznatljivosti u regiji i šire.

Certifikatom je istaknuto da RMU „Banovići“ zadovoljava kriterije izvrsnosti za 2024. godinu, te da spada među najpouzdanije bosanskohercegovačke poslovne subjekte koji imaju pravo korištenja međunarodnog statusa AAA kao simbola.

Preduzeće sa statusom zlatne bonitetne izvrsnosti posluje izvrsno, sa naglaskom da vjerovatnoća za ulazak u jedan od negativnih događaja u narednih 12 mjeseci je izrazito nisko, što znači da je procenat vjerovatnoće za stečaj ili likvidaciju manji od 0,08%, vjerovatnoća brisanje subjekta iz poslovnog registra 0,81% kao i blokada transakcijskih računa.

Pomenuti certifikat predstavlja validnu kartu za ulazak u nova tržišta i olakšava komunikaciju sa potencijalnim klijentima, te certificirani privredni subjekti ostvaruju i druge benefite na polju poslovanja i proširenja istog.



FOND SOLIDARNOSTI RMU „BANOVIĆI“ d.d. BANOVIĆI

OSIGURANO STIPENDIRANJE DJECE POGINULIH I UMRLIH RADNIKA RUDNIKA



Već godinama unazad iz Fonda solidarnosti RMU „Banovići“ d.d. Banovići vrši se stipendiranje djece poginulih i umrlih radnika Rudnika koji pohađaju osnovno, srednje i fakultetsko obrazovanje.

Na ime stipendija za školsku 2023./2024. godinu izdvojeno je 37.300 KM i stipendirano 27 djece, od toga njih 10 su djeca koja su pohađala osnovnu školu, 11 su bili učenici u srednjoj školi, dok je na evidenciji Fonda solidarnosti bilo 6 studenata.

Ukupan iznos sredstava koji su prikupili radnici na ime stipendiranja djece njihovih umrlih ili poginulih kolega u 2023. godini iznosio je 24.000 KM. Prikupljena sredstva nisu bila dovoljna za svih 27 stipendija, te je razlika od 13.300 KM namirena iz ranijih godina.

Iz Fonda solidarnosti ističu da je u 2020. godini ukupno 1.718 radnika bilo u članstvu Fonda nakon čega su, imenovanjem privremene uprave u 2020. godini članovi Uprave ali i rukovodioci obilazili pogone i sugerisali radnicima da napuste Fond solidarnosti. U toj namjeri su djelimično uspjeli, tako da je oko 500 radnika napustilo Fond.

- Ovim putem se želimo iskreno zahvaliti svim radnicima koji nisu podlegli pritisku i ostali članovi Fonda. Na žalost, sve je veći broj djece koji se

stipendiraju iz Fonda i mi ćemo sigurno nastaviti raditi u korist porodica i djece naših kolega - kazao je Sifet Ikanović, predsjednik Fonda solidarnosti RMU „Banovići“ d.d. Banovići.

Upravni odbor Fonda solidarnosti je na sjednici održanoj 15.09.2024. godine donio Odluku o raspisivanju konkursa za dodjelu stipendija za školsku 2024./2025. godinu. Rok za prijavu na konkurs je 25 dana od dana objavljivanja Odluke.

Svi zainteresovani koji žele pomoći rad Fonda isto mogu učiniti prijavom u Fond, na osnovu koje će na mjesečnom nivou izdvajati simbolična suma novca za pomoć djeci bivših kolega.

SINDIKALNA ORGANIZACIJA "BANOVIĆI" d.d. BANOVIĆI
 Ulica Alipa Đizdževića 30 (Radnički dom II sprat) 73200 Banovići/Tel. broj: 06387 23 876-
 000. GSM: 062 198-384. Fax: 06387 23 876-851. Telefonski telefon: 1213003118289-43
 Turizamsko naselje d.d. Pijeta Banovići

Fonda solidarnosti radnika RMU „Banovići“ d.d. Banovići
 Broj FS- 2399
 Datum: 15.09.2024. godine

Na osnovu člana 7., 8., 9., 10. i 11. Pravilnika Fonda solidarnosti radnika RMU „Banovići“ d.d. Banovići od septembra 2016. godine, Upravni odbor Fonda solidarnosti je na sjednici održanoj 15.09.2024. godine donio

O D L U K U

o raspisivanju konkursa za dodjelu stipendija djeci poginulih i umrlih radnika RMU „Banovići“ d.d. Banovići za školsku 2024/2025. godinu

I
 Upravni odbor Fonda solidarnosti odlučio je da u školskoj 2024/2025. godini stipendira djecu poginulih i umrlih radnika i to:

- učenike osnovne škole u mjesečnom iznosu od po 100,00 KM u periodu od 10 mjeseci, što je u ukupnom iznosu za školsku 2024/2025. godinu 1000,00 KM po učeniku
- učenike srednje škole u mjesečnom iznosu od po 150,00 KM u periodu od 10 mjeseci, što je u ukupnom iznosu za školsku 2024/2025. godinu 1500,00 KM po učeniku
- redovne studente na visokobrazovnim ustanovama u mjesečnom iznosu od po 200,00 KM u periodu od 10 mjeseci, što je u ukupnom iznosu za školsku 2024/2025. godinu 2000,00 KM po studentu

II
 Stipendiranje učenika i studenata iz člana I ove Odluke izvršit će se u školskoj 2024/2025. godini u periodu od 10 mjeseci, počev od 01.09.2024. godine do 30.06.2025. godine

III
 Vrijeme za dostavljanje potrebnih dokumentacije je 25 dana od dana objavljivanja Odluke

IV
 Odluka stupa na snagu danom donošenja

Dostavljeno:

- 1x Sindikalna org. RMU „Banovići“ d.d. Banovići
- 1x Predsjednik SO
- 1x Predsjednik FS
- 1x Sekretar FS
- 5x Oglase table RJ
- 1x a/s

Upravni odbor Fonda solidarnosti
 Sifet Ikanović

